

2 TESALONAIKA

Rau Yo Paulu Iwode Pang Di Tesalonaika I, In Ru Ki

1 ¹Au Paulu aye Selas ye Timoti amyawara rau naii pang ang di tooltool yo kagaua ye bareme ke Yesu a kayepe ye malala mai Tesalonaika nga. Ang ngan di tooltool ke Tamada Maro iye Tool Mai kiidi yo Yesu Kirisi i. ²Nen le ampatarau pang Tamada Maro iye Tool Mai kiidi Yesu Kirisi nen, be yaru lodi pang a tiyei dada dook mata pang inbe tikaua lo silene kidi pang.

Maro Ole Ikarata Betanga Kidi Tooltool Dook Mata San

³Ang di diemam nga, kanakana ngan amwete lo ponana kiam pang Maro yang. Ngan dook mata le amyeyi nen, yesoo ye lomim medana yo kataru pang Yesu i, in ise le mai, inbe lomim yo pang di diemim nga, ngan ise le mai lapau. ⁴Ngan la ye kene yo ampa a amla ye di tooltool ke Maro yo tigaua ye bareme ke Yesu nga, ngan amgasang pang di a amyitmak emim. Nen le amgasang pang di tooltool ye dada dook tiap yo di tooltool kapala tiyei pang a tigarungang ye yo kattoo Kirisi nga, inbe ye urata moonoo yo tiyei pang, bong kakodo le kamede a kaparama lomim medana yo kataru pang Yesu in nga.

⁵Ngan ye so tina yo pombe nga, ngan ke be ipatnaia dada dook mata san yo Maro be ikarata betanga kidi tooltool ye i, in paidi. Nen le ang di tooltool yo karaua panga le kasolo urata moonoo nga, ngan ole ikamatang ben ang ngan tooltool dook mata ke be kalo kagaua ye di tooltool yo be matan kala di nga. ⁶Maro ole ikarata betanga kidi tooltool dook mata san. Le ole irau kiang a ikaua urata moonoo pang di tooltool yo tikaua urata moonoo pang nga. ⁷Inbe ole igiri urata moonoo yo kasolo nga, a ikaua maryoongoo dook mata pang inbe pam nen lapau. Ngan so tina ngan ole pombe ye lal yo be Tool Mai Yesu iye di bangabangana ki yo guradi mata nga, ngan tipa ye ei loloana somai ke malala ke Maro a

tisi pombe mallangana ye i. ⁸Le ole iyemenai di tooltool yo lodi galanga ye Maro tiap nga, inbe tiraua pang bingi dook mata ke Tool Mai kiidi Yesu tiap ngan lapau. ⁹Nen le ole iyemenai di tooltool tina a igarung di le ikenen leu, inbe ole Tool Mai inganga di a tiyepe manga mooloo ye matana inbe ye gurana mai ki in nunngana. ¹⁰So tina ole pombe ye lal yo Maro itaru pang Tool Mai be imulu a isi ye i, a be nen ngan dada dook mata yo iyei pang di tooltool yo ipootoo di panga ya taunu ngan ole iyeie ene le ilo ete ke be di tooltool tipayiti, inbe di tooltool tina yo titara lodi medana panga nga, ngan ole lodi ponana kaiye. Ngan ang lapau, yesoo katara lomim medana ye betanga yo amwete pang ye nga.

¹¹Ngan nen le kanakana nga, ngan ampatarau pang Maro be ikamatang ben ang di tooltool dook mata yo ke be iku di panga ya taunu nga. Inbe ampatarau panga nen, be ilonang ye gurana ki a be nen ngan urata dook mata le imot yo lomim kaua urata ye nga, inbe urata dook mata yo ipa ye lo medana kiang nga, ngan ole kayei le itar kanono dook mata. ¹²Ampatarau nen a be nen ngan dada dook mata yo Tool Mai kiidi Yesu iyei pang nga, ngan ole iyeie ene le ilo ete ke be di tooltool tipayiti. Inbe ang lapau, ole emim ilo ete ke be ipayitang ye, yesoo Maro kiidi iye Tool Mai Yesu Kirisi lodi pang a tiyei dada dook mata pang.

Tool Ke Sak Noonongoo Ole Pombe

2 ¹Ang di diemam nga, nga be amwete pang ye mulenge ke Tool Mai kiidi Yesu Kirisi, inbe ye gaongo kiidi yo be lo taye tagaua ye i. Nen le amwete pang nen, ²kin katakrai palbe leu a lomim kap gogo dada ye betanga ke di tooltool kapala yo tiwete be lal ke Tool Mai yo be imulu a isi ye i, in pombe koot, ngan be. Di tooltool tina ole tillung be betanga tani in ipa ye betanga yo amkaua Maro koonoo be amwete nga, too ipa ye betanga yo amwete pang di tooltool kapala nga, too ipa ye rau yo amwodo nga. ³Bong kin kalongo pang tool sa yo be illungang ye betanga nen, ngan be. Yesoo, lal tani in ole pombe sokorai tiap, bong muku ngan ole di tooltool alunu la be tiwala muridi pang Maro nga, inbe tool ke sak noonongoo ole pombe mallangana. Ya in tool tani yo be ilo pang ye malala ke masngana i. ⁴Ngan tool tani ole iyei ben koi pang so le imot yo di tooltool tisung pang di a tiwete di ye maro kidi nga. Inbe ya taunu ole iyitmaka ene le ilo ete ye so ke Maro nga le imot, a be nen ngan ya taunu itaru le lo iwur bareme mai ke sungunu lono, inbe iwete be ya taunu in la Maro i.

⁵Lomim kalli, too? Ye kene yo ayang tayepe ye in nga, ngan awete pang ye so tina ngan oo. ⁶Nen le ang ngan lomim galanga ye tool yo nookoot nga ilele tool tani a le se pombe mallangana tiap i. Bong ole ise pombe mallangana ye lal yo Maro itaru panga be ise pombe ye i. ⁷Bong ngan nookoot nga dada ke sak noonongoo in ipa sollono go. Ngan ole ipa

sollono nen le ilo ye lal yo be Maro inganga tool tani yo ilele i, in le ikoo, ⁸ngan la be tool ke sak noonoongoo tani in ole se pombe mallangana nga. Ya in tool tani yo be Tool Mai Yesu isi ngan ole iwete leu a amunu yo ipas ye koonoo a isi in iraumate le imata, inbe igarungu ye gurana mai ke nunngana i. ⁹Ye kene yo be tool ke sak noonoongoo ise pombe mallangana ye in nga, ngan ole ipa ye gurana ke tool dook tiap Satan, a be nen ngan iyei gogo mos matana matana le urata medana maimai yo iyei tarkilanga panga a be di tooltool tikamata ngan koodi panganga ye nga. Ngan nen le ole tiyeisa Maro la o ikaua gurana panga be iyei so ye i. ¹⁰Inbe tool tani in ole iyei dada dook tiap matana matana a ikap lungunu ye di tooltool yo titoo dada yo be Maro igarung di ye nga. Di ngan ole Maro igarung di nen, yesoo lodi mai san pang betanga moolmool tiap, le ke be ikap di a ipamulu di ye dada dook tiap yo be igarung di i, in tiap. ¹¹Ngan ye punu i, in la le Maro iyei lodi a be nen ngan titara lodi medana ye betanga yo ke kaplungunu nga. ¹²Ole iyei di tooltool tina nen, a be nen ngan ikarata betanga kidi tooltool le imot yo titara lodi medana pang betanga moolmool tiap, inbe lodi ponana ye dada dook tiap yo tiyei nga.

Kakodo Le Kamede

¹³Bong di diemam nga, Tool Mai lono pang mai san le kanakana ngan amwete lo ponana kiam pang Maro yang. Ngan dook mata le amyeyi nen, yesoo kulkulunu yege ye kene yo Maro itar lang le tana tiao nga, ngan ipootang panga a be nen ngan ipamulang ye so dook tiap yo be igarungang i. Ngan ipamulang ye urata yo Amunu iyeii yang a be kayepe dawa ben di tooltool yo ipootoo di panga ya taunu nga, inbe ye lomim medana yo kataru ye betanga moolmool ki i. ¹⁴Maro iku ang panga ye bingi dook mata tani yo amwetewete pang ye i. Ngan ye yo a le iyei nen nga, ngan be nen a ye kene yo di tooltool tikamata Tool Mai kiidi Yesu Kirisi be ene mai san ke be tipayiti nga, ngan ole di lapau tipayit emim le ipa ye ene. ¹⁵Ngan nanga ang di diemam nga, kakodo le kamede. Inbe kaparama patomonaingi tina yo amwete pang ye koomam too amwodo ilo ye rau a amyawar pang nga.

¹⁶⁻¹⁷Nen le ampatarau pang Tamada Maro yo lono paidi mai san i. Ya in iyei dada dook mata paidi, a nen ngan ipamede lodo le ikenen leu inbe tatara lodo le atu ye so dook mata yo be pombe i. Le ampatarau panga iye Tool Mai kiidi Yesu Kirisi be tipamede lomim, inbe tipamedang ye dada dook mata yo katoo nga inbe ye betanga dook mata yo kawete nga.

Paulu Lono Be Di Tesalonaika Tiloni Ye Pataraungu

3 ¹Ang di diemam nga, ngan betanga kiam kapala yo be amwete porai ngan nen. Am nga lomam be kapatarau pang Maro yam a be nen ngan bingi dook mata ke Tool Mai yo amraii in idada a ingaua ni mai i le imot, inbe

di tooltool tipayiti bingi dook mata tani dawa ben tina yo ang kayei nga. ²Inbe kapatarau pang Maro a be nen ngan iwonam ye di tooltool dook tiap ke yeingi noonoo. Yesoo, di tooltool yo nen ngan alunu la titara lodi medana pang Yesu tiap nga. ³Bong Tool Mai in ole itoo betanga ki le imot yo iwete nga. Ya la be ipamedang inbe matan kalang dook mata ye tool dook tiap Satan i. ⁴Ngan am nga lomam galanga nen be Tool Mai ilonang le soo so yo amwete pang ye be kayei nga, ngan kayei le katoo betanga kiam dook, inbe pang dama ni ngan ole kayei nen lapau. ⁵Nen le ampatarau pang Tool Mai be ipasongosongo lomim a be nen ngan lomim galanga ye Maro lono yo mai san pang i, inbe ye dada yo be kakodo le kamede a kasolo urata moonoo dawa ben Kirisi isolu urata moonoo i.

Kin Tinimim Booroomoo Be

⁶Ang di diemam nga, ye Tool Mai Yesu Kirisi ene ngan amwete pang nen. Kumata le be di diede sa be tinidi booroomoo a tiyep sokorai, inbe titoo betanga yo ampatomonai ang ye ngan tiap nga, ngan kapa manga mooloo ye di. ⁷Amwete pang nen, yesoo ang tapmim ngan lomim galanga be katoo am ye dada kiam yo amyeyi nga. Am nga ye kene yo amyang tayepe ye in nga, ngan tinimam booroomoo a amyep sokorai tiap, ⁸inbe tool sa ikap sokorai kaningi ki pam a amkan sokorai, ngan tiap. Bong so tina ngan amyimi leu. Nen le amkaua urata mai san ye ke le bong tina yo kanakana nga a be nen ngan ampaloko urata moonoo sa ilo yang be. ⁹Am nga ke be amwete pang a kalonam ye kaningi, bong amyeyi nen tiap. Le amkaua urata le guramam nga, ngan be nen a ampatnai dada dook mata pang a be nen ngan katoo. ¹⁰Ngan ye kene yo amyang tayepe ye in nga, ngan amkap betanga yo nen ngan pang lapau. Le amwete pang nen, “Kumata le tool sa lono be iyei urata tiap nga, ngan ke be ikan so tiap lapau.”

¹¹Ngan amwete nen, yesoo amlongo betanga be di tooltool kiang kapala tinidi bese ye urata tiap le tiyep sokorai, bong koodi paweserai di diedi ye urata kidi yo tiyeyi nga. Bong di tapdi ngan tiap. ¹²Ngan nanga, ye Tool Mai Yesu Kirisi ene nga, ngan amwete betanga medana pang di tooltool tina nen be tiyep moonombe, inbe tiyeyi urata ye kaningi le so yo be tikap a tikan nga. ¹³Inbe ang di diemam nga, ang ngan kin tinimim booroomoo ye dada dook mata yo kayei, ngan be.

¹⁴Kumata le be tool sa itoo betanga kiam yo amwodo ilo ye rau i tiap nga, ngan kapaposi ila mallangana. Inbe kin kaye kagauagaua be, a be nen ngan moomoonoo ye dada dook tiap ki yo iyei nga. ¹⁵Bong kin kayeyi dawa ben in koi kiang ngan be. Bong in emim atu a be nen ngan kakap betanga panga a kapassonga ye dada yo dook mata nga.

Betanga Ke Lo Ponana

¹⁶Nen le nookoot nga ampatarau be Tool Mai yo lo silene ipa ye, in ya taunu ikaua lo silene ki pang ye ke tina yo kanakana nga, inbe ye dada tina matana matana ngan lapau. Tool Mai iyepe yang ang le imot.

¹⁷Ngan ye motingi ke rau i nga, ngan au Paulu awodo betanga ke lo ponana nga ye au tauk baik. Ngan awodo nen a be nen ngan iyei ben tarkilanga kiau ye rau le imot yo awodo nga. ¹⁸Le Tool Mai kiidi Yesu Kirisi lono pang a iyei dada dook mata pang ang le imot.